



Grupo Provincial Socialista

Rúa Progreso, 32 – 2º andar

32003 Ourense

Tif. 988 385 203 Tif/Fax. 988 385 178

ELVIRA LAMA FERNÁNDEZ, voceira e deputada provincial do **GRUPO SOCIALISTA** da Deputación de Ourense, en base ó previsto na Lei de Bases Reguladora do Réxime Local, ó artigo 91 e 97, entre outros, do R.O.F. e o Regulamento da Corporación presenta unha **MOCIÓN CONTRA A DISCRIMINACIÓN DA PROVINCIA DE OURENSE NO TOCANTE AO SERVIZO DE HEMODINÁMICA DO COMPLEXO HOSPITALARIO UNIVERSITARIO DE OURENSE** en base á seguinte;

EXPOSICIÓN DE MOTIVOS

Falar da nosa provincia en termos reais hai tempo que implica asumir datos desoladores, non só en termos demográficos ou de desenvolvemento socio-económico senón no aspecto dos servizos máis fundamentais. Entre estes servizos está o que poderíamos considerar máis imprescindible: o sanitario. Á afronta que sofren determinadas zonas da nosa provincia, en termos de recortes no eido da saúde pública, hai que sumar ter a dubidosa honra de ser, con Lugo, unha das provincias cun maior índice de mortalidade a causa dos infartos de miocardio, triplicando os índices de A Coruña e Pontevedra.

De feito, son os datos alarmantes de Lugo os que deberon facer reconsiderar a súa posición ao Sergas no tocante ao servizo de hemodinámica do Complexo Hospitalario Universitario de Lugo. Acaban de anunciar que amplían o horario de atención ás 24 horas, despois de anos de loita dos e das lugueses e luguesas así como do goberno da cidade e da deputación. Tal como denunciámos en xaneiro do ano pasado, de ano en ano, tanto Lugo coma a nosa provincia, compiten, no peor senso da palabra por ver quen encabeza as porcentaxes de incidencia desta grave enfermidade ou por liderar o ranking das taxas de mortalidade por causa de infarto de miocardio.

Ademais de compartirmos unha estrutura socio-demográfica moi parecida, as dúas provincias tiñan un uso da unidade de hemodinámica en horario de xornada laboral ordinaria, de 8 a 15 horas ata o anuncio da ampliación ata as 22 horas en febreiro do ano pasado, após as mobilizacións e denuncias políticas. Porén, esta ampliación seguía a ser insuficiente se temos en conta que en Pontevedra e A Coruña teñen o servizo durante as 24 horas.

Xa se indicou no seu momento que son numerosos os estudos científicos, mesmo da propia Sociedade Española de Cardiología, que vinculan o uso destas unidades co éxito no tratamento e prevención do infarto agudo de miocardio. Sen embargo en Ourense, para ser tratado na unidade de hemodinámica do CHUO, coa rapidez que estes casos requiren, ten que che dar o infarto en horas de servizo da unidade. A opción que lle queda a calquera persoa desta provincia, fóra do horario actual, afectada por esta doenza é que o trasladen a Vigo. Os primeiros datos do Rexistro Galego de Infartos din que, tanto en Ourense coma en Lugo, o tratamento da crise coronaria mediante hemodinámica está unha hora por enriba do recomendado.

Polo tanto a pesares de contarmos cun servizo que, a pleno rendemento, podería evitar a complicación dos síndromes coronarios agudos e, polo tanto, diminuír a incidencia desta patoloxía cardiovascular e mesmo a alta mortalidade por esta causa, os e as ourensáns/as corremos un maior risco ante as doenzas coronarias por mor do noso lugar de residencia. Está amplamente demostrado

Email: gruposocialista@depourense.es

Twitter: @PSdeGDepOU



Grupo Provincial Socialista

Rúa Progreso, 32 – 2º andar
32003 Ourense

Tlf. 988 385 203 Tlf/Fax. 988 385 178

que a hemodinámica de proximidade e a cirurxía de urxencia en caso de isquemia coronaria aguda, evita que o suceso derive nun infarto coas complicacións que leva apareladas ademais do risco mortal inherente. Estamos, xa que logo, ante un caso manifesto de discriminación cara á nosa provincia á que non se lle pon remedio pese a termos a unidade implantada dende o 2009 e o compromiso do goberno do PP dende o 2011, momento no que se aprobou, no Parlamento galego, por unanimidade unha moción do grupo socialista para garantir o funcionamento da unidade de Ourense durante as 24 horas do día.

A todas luces estamos ante un caso flagrante de agravio comparativo cara a nosa provincia e os seus habitantes, posto que o risco vital é directamente proporcional ó tempo de demora na intervención de urxencia. Este agravio vese incrementado desde que, este ano, se anunciou que a unidade de Lugo pasa a funcionar as 24 horas. Ourense pasa a ser a única das provincias galegas sen ter o servizo completo da súa unidade de hemodinámica.

Dito noutras palabras, ata para evitar o risco de morrer por esta enfermidade hai que ter en conta o código postal. Hai moito tempo que denunciámos que se trata dunha marxinação cara Ourense que pode ser evitada e subsanada dende a vontade política real. Hai un ano, o grupo maioritario nesta corporación, bloqueou a posibilidade de loitar de xeito unánime para que os e as ourensáns e ourensás teñamos os mesmos dereitos sanitarios, en pé de igualdade, en toda Galicia.

Ó tempo, insistimos en rexeitar as escusas dun goberno autonómico que teima en cuestionar a idoneidade desta ampliación en base á súa rendibilidade para non ter que aportar recursos a un servizo resulta decisivo na resolución exitosa do evento cardíaco e na calidade de vida posterior do doente. O goberno do PP na Xunta de Galicia da sobradas mostras do seu afán por marxinar a nosa provincia, insistindo desde hai anos nos recortes sanitarios e impedindo que haxa unha equiparación co resto do país.

Polo exposto, o Grupo Socialista presenta as seguintes **PROPOSTAS DE ACORDO**:

1. Esixir á Xunta de Galicia, de maneira inmediata, a implantación do servizo de Hemodinámica 24 horas, os 7 días da semana no Complexo Hospitalario Universitario de Ourense.
2. Que a Deputación de Ourense esixa da Xunta de Galicia, da Consellería de Sanidade e do propio Sergas que poñan fin á discriminación á que teñen sometida a Ourense en materia de servizos sanitarios.

En Ourense, 29 de xaneiro de 2019

Asdo. A Portavoz

SR. PRESIDENTE DA DEPUTACIÓN PROVINCIAL DE OURENSE

Email: gruposocialista@depourense.es

Twitter: [@PSdeGDepOU](https://twitter.com/PSdeGDepOU)